

# ALAHADY FAHA 15 MANDAVANTAONA - A



## **NOKENDREN'ANDRIAMANITRA HISY VOKANY EO AMIN'NY FIAINANTSIIKA, NY TENINY**

Ry Kristianina havana, tsy hoe mandeha anjambany antsika raha zary Kristy eo anivon'ny mpiara-belona amintsika fa natao ho fahazavana sy fanasina ka ny tenin'Andriamanitra no manilo ny fiainantsika, izy no jiro manentana ny fiainantsika.

Izany no lohahevi-dehibe androany Alahady faha 15 mandavantaona handalinantsika ny finoantsika izay hirosoantsika lalindalina kokoa amin'ny maha-Kristy mpiara-belona amin'olona antsika tsirairay. Ny vakiteny voalohany ao amin'Izaia mpaminany milaza fa “*Ny ranon'orana aman'oram-panala milatsaka avy any an-danitra tsy miverina any, raha tsy efa mahavonto sy mahalonaka ny tany, sy*

*mampaniry ny zavatra mitsiry avy aminy, ka mampahazo voa famafy ny mpamafy, ary hanina ho an'ny mpihinana; toy izany ny teniko izay aloaky ny vavako; tsy miverina amiko foana izy, fa mahatanteraka izay tiako, sy mahatontosa izay namoahako azy.*”

Vakiteny I : Iz. 55, 10-11

Tononkira : Salamo 64

Vakiteny II : Rôm. 8, 18-23

Evanjely : Mt. 13, 1-23

Ry Kristianina havana matetika averintsika fa ny finoana dia tsy tany malemy anorenam-pangady fa tany lonaka iasan'ny fahasoavan'Andriamanitra ka mampamokatra azy. Io indrindra no lohahevitra tian'ny Eglisy ho tsapantsika amin'izao Alahady faha 15 izao ka entintsika iainana mandritra ny herinandro. Mibaribary izany ao amin'ny fanoharana ao amin'ny Evanjely izay fanoharana entin'i Jesoa manambara ny anjara toeran'ny fanjakan'ny lanitra eo amin'ny fiainantsika izay mahatonga antsika ho Kristy mpiara-belona amin'olona. Fanoharana amin'ny voa nafafy no ataon'i Kristy androany. Fantantsika tsara fa amin'ny alalan'ny fanorahana matetika no ampianaran'i Jesoa, inona ary no antony hanaovany fanoharana ?

I Kristy dia tena mpiara-belona tamin'ny olona tokoa satria ny fiainana andavanandro, zavatra iainan'olona andavanandro no ataony fanoharana ka nampianarany ireo vahoaka. Ambarany antsika ny antony anaovany ny fanoharana : “ *Satria ianareo no nomena hahalala ny zava-miafina amin'ny Fanjakan'ny lanitra fa izy ireo tsy mba nomena izany. Fa izay manana dia homena ka hanam-be izy, ary izay tsy manana kosa, na dia izay ananany aza dia hoesorina aminy* ”

Raha mahatsikaritra isika dia I Jesoa manazava amintsika ireny fanoharana ireny satria tiany ny hampibebaka ireo nihaino azy satria fantany tsara ireo hevitr'ireo fanoharana ireo.

Androany Alahady faha 15 dia fanoharana mikasika ny mpamafy izay nirahina hamafy, misy nafafy teny amoron-dàlana, nisy nafafy tamin'ny tany be vato, nisy nafafy tamin'ny tany anaty tsilo, nisy nafafy tamin'ny tany lonaka. Ny teny amoron-dàlana nalaky nitsiry nefo tsy naharitra, matetika isika faly nandray nefo mandeha ho azy ny fiainana tsy misy “entretien” ny finoana ka aoka mba araraotintsika izao fotoana izao handalinantsika ny finoana mba tsy ho azon'ilay ratsy satria fa maro ny mpanararaotra amin'izao fotoana izao ka mitarika atsika etsy sy eroa, misy Kristy piraty amin'izao fotoana iainantsika izao ka tandremo fa indrindra isika tanora. Izany indrindra efa antomotra ny hanaovantsika ny JMJ eto amin'ny diosezy, alalino tsara ny finoantsika satria izay anisany antony anaovantsika izao JMJ izao mba tsy ho eny amoron-dàlana fotsiny ny tenin'Andriamanitra fa ho latsa-paka amin'ny fiainantsika. Maro ireo miroso amin'ny komonio voalohany sy konfirmasio, aoka mba tsy ho amoron-dàlana na zavatra ety ivelany na koa amin'ny tany be vato no mirotsaka ireny fahasoavana nomen'Andriamanitra ireny, mba tsy amin'ny tany be tsilo izany hoe tratin'ny rendrarendra isika fa aoka mba amin'ny toerana lonaka ka ny finoana no iasan'ireny fahasoavana sy fandalinam-pinoana ataontsika ireny mba hanampy antsika hihaina tanteraka ny maha Kristianina, tahaka ny hamafisin'i Md Paoly ao amin'ny vakiteny faharoa : *na dia eo aza ny fahoriana, na dia eo aza ireny voninahitra atolotr'izao tontolo izao, fakofako ireny raha eo anatrehan'ny fahasoavan'Andriamanitra, na dia misy sedra aza, aoka tsy ho kivy na ho ketraka isika amin'ireny zava-misy amin'ny fiainantsika ireny fa tsy mantsy miroso isika.*

Ary izao no anasako ny tanora amin'ny fanomanana ny JMJ ato amin'ny diosezy mba ho vory maro be sy ho maro be koa ianareo tanora hirotsaka ka handalinantsika miaraka ny lohahevitra FAHASAMBARANA TOKOA AO AMIN'I KRISTY izany hoe mamokatra ny fiainana satria tanora dia mpamokatra izay mitondra amin'ny hafaliana ary rarina ho hafaliana maharitra fa tsy hafaliana mandalo fotsiny ka mamokatra zato heny. Raha tiantsika hamokatra ny fiainantsika dia halalino ny hoe “Sambatra ny malemy fanahy fa handova ny tany izy” izay midika hoe hamokatra tokoa ny fiainany.

Ry Jesoa Tompo ô, izao tany izao araky ny fantantsika ny tranobe iombonana, nosombaintsika anefa izy mitady tsy hamokatra intsony ka ny fiainantsika lasa tsizarizary mihapotika, raha te hampamokatra ny fiainantsika isika , aoka hapetrantsika eo anivontsika tokoa i Kristy, apetrantsika eo anivon'ny fiainantsika ny tenin'Andriamanitra dia tsy iza fa i Kristy ka amin'izay afaka hiroso lalindalina tokoa isika ka ny herin'ny tenin'Andriamanitra hanova ny fiainantsika dia ho zary tany lonaka ny fiainantsika ka hamokatra telopolo heny, hamokatra zato heny. Amen